

## Morning Regional Dogri News Bulletin, 20<sup>th</sup> July 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में पवन वर्मा।

### Headlines

1. केन्द्री गृहमंत्री अमित शाह होरें आतंकी नेटवर्क गी खत्म करने लेई सुरक्षा अजेंसिएं दे बकशर पुक्खता तालमेल उप्पर जोर भरेआ।
2. सरकार जम्मू संभाग च आतंकी गतिविधिएं गी खत्म करने लेई ग्राम रक्षा गार्ड आली बवस्था गी परतियै आन्नग।
3. 3 ज्हार 471 श्रद्धालुएं दा नमां जत्था जम्मू थमां पवित्र गुफा लेई होआ रवाना।
4. महिला एशिया कप टी-20 क्रिकेट च भारत नै पाकिस्तान गी 7 विकटें कन्नै हराया।

हून खबरें दी तफसील कन्नै विजय बजाज।

<><><><><><>

### **Amit Shah**

केन्द्री गृहमंत्री अमित शाह होर देसै दी सुरक्षा गी ठेह पजाने आले खतरे गी दूर करने लेई आतंकवादी नेटवर्क ते उंदे समर्थन आली प्रणाली गी भंग करने लेई सुरक्षा ते कनून नाफज करने आली अजेंसिएं बशकार मते तालमेल उप्पर जोर भरेआ। कल नमीं दिल्ली च सुरक्षा ते कनून नाफज करने आली अजेंसिएं दे बक्ख-बक्ख प्रधानें कन्नै इक उच्च स्तरीय बैठक दी अध्यक्षता करदे होई गृहमंत्री होरें देसै च सुरक्षा चुनौतिएं कन्नै निबड़ने लेई आईबी दे मल्टी अजेंसी सेंटर दे कम्मकाज दी समीक्षा कीती तेआखे जे नमीं उभरदी सुरक्षा चुनौतिएं लेई सुरक्षा अजेंसिएं गी म्हेशां इक गैह अगगे रौहना चाहिदा।

<><><><><><>

जम्मू संभाग च आतंकी वारदातें गी दिखदे होई केन्द्र सरकार ग्राम रक्षा गार्ड आली बवस्था गी परतियै लेआ करदी ऐ ते सरकार उनेंगी नमें थेआरें कन्नै लैस करग। केन्द्री मंत्री डॉ. जितेन्द्र सिंह होरें दस्सेआ जे

प्रधानमंत्री नरेन्द्र मोदी होर विलानागा सुरक्षा स्थिति गी दिक्खा करदे न ते आतंकी वारदातें गी मकानें लेई नमीं रणनीति तैआर कीती जा'रदी ऐ। केन्द्री मंत्री होरें कल किशतवाड च हे। उनें आखेआ जे ग्राम रक्षा गार्ड आतंकी गतिविधिएं गी खत्म करने च अपनी महत्वपूर्ण भूमका नभाई सकदे न। उनें आखेआ..... बाईट

<><><><><><>

## Army Chief

सेना अध्यक्ष जनरल उपेन्द्र द्विवेदी होर केन्द्र शासत प्रदेश ते खास तौर पर जम्मू खित्ते च बने दे सुरक्षा हालात दा जायजा लैने लेई जम्मू आवै करदे न। उंदा एह दौरा नमीं दिल्ली च प्रधानमंत्री नरेन्द्र मोदी हुंदी प्रधानता च लाई गेदी सुरक्षा सरबंधी कैबिनेट कमेटी दी बैठक दे परेंत लगा करदा ऐ जेहदे च आतंकवाद दा समूलचा नास करने लेई पुट्टी जाने आली गैई पर चर्चा कीती गई। जंदी 30 जून गी सेना अध्यक्ष दा औहदा सांभने परेंत जनरल द्विवेदी हुंदा खित्ते दा एह दुआ दौरा होग। इस दौरे दा मता महत्व इस करियै बी ऐ की जे एह दौरा सुरक्षाबलें पर हाल च होए दे हमलें ते आतंकी गतिविधिएं च आई दी तेजी गी दिक्खदे होई लाया जा करदा ऐ। जनरल द्विवेदी होर फौज दे आला कमांडरें कन्नै सुरक्षा हालात दा जायजा लैंगन। मेद ऐ जे पुलस दे आला अफसर बी इस बैठक च शामिल होई सकदे न।

<><><><><><>

## I.T.Outage India

माइक्रोसाफ्ट साफ्टवेयर च कल होई दी बड्डे स्तर दी गड़बड़ी दे बावजूद बी भारतीय लैन देन आले सरिस्ते पर आम तौरा पर कोई मता असर दिक्खने गी नेई लब्भा। भारतीय रिजर्व बैंक आस्सेआ जारी इक ब्यान मूजब माइक्रोसाफ्ट साफ्टवेयर च आई दी गड़बड़ी कारण भारत दे शडे 10 बैंक दे लैन देन आले सरिस्ते च ममूली गड़बड़ी दिक्खने गी लब्भी जिसलै जे बाकी सारे सरिस्ते राएं लैन देन सामान्य आला लेखा जारी रेआ। आरबीआई नै आखेआ जे भारत दे ज्यादातर बैंकें दा आई.टी.आधारित सरिस्ता क्लाउड पर निर्भर नेई ऐ ते शडे किश गै बैंक इस क्लाउड स्ट्राइक टूल दा इस्तेमाल करदे न। अदायगिएं सरबंधी भारत दे राष्ट्रीय निगम एनपीसीआई दे मुख् कार्जकारी अधिकारी दिलीप आसबे होरें आखेआ ऐ जे यूपीआई समेत मुख् दे लैन देन आला सारा आई.टी आधारित ढांचा, इस वैश्विक गड़बड़ी कोला प्रभावत नेई होआ। उआं आरबीआई नै सरबंधत सब्बने बैंकें, संस्थानें ते होरने घडें गी भविक्ख च ऐसी कुसै गड़बड़ी जां चुनौती दी मार हेठ औने कोला बचे रौहन लेई मता सौहगा ते तैआर रौहने दी सलाह दित्ती ऐ।

<><><><><><>

## President Award

राष्ट्रपति द्रौपदी मुर्मू होंरें कल सशस्त्र बलें ते भारती तटरक्षक बल दे सेवारत ते सेवा निवृत्त कर्मिं गी 94 विशिष्ट सेवा पुरस्कार प्रदान कीते। राष्ट्रपति होंरें 31 परम विशिष्ट सेवा पदक, 4 उत्तम युद्ध सेवा पदक, 2 बार टू अति विशिष्ट सेवा पदक ते 51 अति विशिष्ट सेवा पदक प्रदान कीते। राष्ट्रपति होंरें राष्ट्रपति भवन च रक्षा अलंकरण समारोह 2024 दे दुए गेड़ च एह पुरस्कार प्रदान कीते।

<><><><><><>

## VP-Climate Change

उपराष्ट्रपति जगदीप धनखड़ होंरें आखेआ जे जलवायु परिवर्तन इक वैश्विक आपदा दे रूपै च उभरा करदा ऐ ते दुनिया भरै च सामुदायिक पतन लेई जिम्मेवार ऐ। एह गल्ल उनें कल नमीं दिल्ली च पीएचडी चैंबर ऑफ कामर्स ते इंडस्ट्री आस्सेआ Bioenergy: Path to Viksit Bharat विषय उप्पर आयोजित चौथे अंतर्राष्ट्रीय जलवायु सम्मेलन गी संबोधत करदे होई आक्खी। उनें एह बी आखेआ जे तौले गै असेंगी जलवायु परिवर्तन लेई नमीं गैह पुट्टनियां पौनियां न।

<><><><><><>

## UIDAI

विशिष्ट पंछान सरबंधी भारती प्राधिकरण-UIDAI नै ओकड़े सब्बने बसनीकें गी सलाह जारी करिये अपने पते दी परतिये तस्दीक करोआने लेई आखेआ ऐ जिनेंगी आधार कार्ड बनोआए दे 10 बरे होइ गेदे न। इत्त सरबंधे च जम्मू कश्मीर दे सब्बने डिप्टी कमीशनरें गी आखेआ गेआ ऐ जे ओह प्रदेश दे बसनीकें गी कुसै बी सहायक दस्तावेज दी मदाद कन्ने अपने पते दी हालिया जानकारी आधार च दर्ज करोआने बारे जानकार बनान। डिप्टी कमीशनरें गी इब्बी आखेआ गेआ ऐ जे ओह बसनीकें गी आधार च अपने हालिया मोबाइल नंबर बारे जानकारी दर्ज करोआने दे सरबंधे च बी जागरूक बनान तां जे ओह आधार कन्ने जुड़ी दिएं बक्ख-बक्ख सेवाएं दे लाह हासल करी सकन।

<><><><><><>

## Amarnath Yatra

जम्मू दे भगवती नगर स्थित यात्री निवास आले आधार शिविर थमां अज्ज 3471 यात्रुएं दा जत्था श्री अमरनाथ जी दे दर्शन लेई सख्त सुरक्षा बंदोबस्ते हेठ घाटी लेई रवाना कीता गेआ। 114एं गड्डिडएं दे काफले च सुआर इनें यात्रिएं चा 1 ज्हार 73 लोक बालटाल ते 2 ज्हार 398 लोक पहलगाम आले रस्तेया यात्रा पूरी करगंन।

<><><><><><>

## EPFO

मुख्य सचिव अटल डुल्लू होरें जम्मू कश्मीर कर्मचारी भविष्य निधि संगठन—जेकेईपीएफओ गी भारत सरकार दे श्रम ते रोजगार मंत्रालय हेठ औने आले केन्द्री ईपीएफओ च मुंतकिल करने दी प्रक्रिया च हासल प्रगति दा जायजा लैता। बैठक दरान ईपीएफओ कन्ने जुड़े दे खातें च दर्ज खरे मते बाद्धे पर लोह पाई गई। 2019 शा पैहले जित्थें इनें खातें दी गिनतरी 4 लक्ख 90 ज्हार 336 ही, उत्थें गै हुन इस प्रक्रिया दे बाद इंदी गिनतरी 7 लक्ख 68 ज्हार 993 होई गेदी ऐ। इस्सै चाल्ली कामयाबी कन्ने नबेड़े गेदे दावें दी गिनतरी बी खरी मती बधियै 4 लक्ख 77 ज्हार 90 होइ गेदी ऐ ते इनें दावें कन्ने जुड़ी दी कुल रकम 2 ज्हार 348 करोड़ रपे ऐ। बैठक दरान एह जानकारी दित्ती गई जे मुंतकिल आली प्रक्रिया तकरीबन सबूरी होई गेदी ऐ ते मते सारे खातें गी डिजीटल बनाइयै केन्द्री ईपीएफ डेटाबेस च मुंतकिल कीता जाई चुके दा ऐ।

<><><><><><>

## DG Akashvani

आकाशवाणी दिएं महानिदेशक मौशमी चक्रवर्ती होरें कल राजभवन श्रीनगर जाइयै उपराज्यपाल मनोज सिन्हा हुंदे'नै मलाटी कीती। प्रोजेक्ट बीकन दे चीफ इंजीनियर ब्रिगेडियर साकेत सिंह होर बी राजभवन जाइयै उपराज्यपाल सिन्हा होरें गी मिले। इस मौके ब्रिगेडियर चिराग घुरा बी उंदे कन्ने हे।

<><><><><><>

## Catch The Rain

खुराक ते सार्वजनिक बंड मैहकमे दे केन्द्री संयुक्त सचिव राजेन्द्र कुमार, जेहड़े जल शक्ति अभियान:कैच द रेन—2024 दे केन्द्री नोडल अफसर बी हैन, होरें कल मीरां साहब ते ओहदे कन्ने लगदे इलाकें दा दौरा लाइयै तलाएं दे निर्माण सनें जल शक्ति सरबंधी कम्में, जल शक्ति विभाग ते ग्रामीण विकास विभाग पाससेआ पानी दी सांभ—संभाल लेई कीते जा'रदे कम्में दी समीक्षा कीती। जमीनी सतह पर कीते गेदे कम्में दा जायजा लैने दे मकसद कन्ने ओह अज्ज बी जिले दे बक्ख—बक्ख ब्लाकें दा दौरा लांगन। एहदे शा पैहले कल उनें जम्मू च अफसरें दी इक बैठक लाइयै "नारी शक्ति स'जल शक्ति" विषय दे तैह्त इस पैहलकदमी च हासल प्रगति ते भविष्य च पुट्टी जाने आली गैई दा बी आंकलन कीता।

<><><><><><>

## Udhyampur Light

उधमपुर दी मुंसपिल काउंसल आस्सेआ कस्बे दे 21 वार्डे च रातीं दे बेल्ले गुप न्हरे दी समस्या शा पार पाने लेई 150 स्ट्रीट लाइटां ते 6 हाई मोस्ट लाइटां लाइयां जा करदियां न। उधमपुर थमां आकाशवाणी संवाददाता अचिन दुबे दी रिपोर्ट मूजब एह कम्म ओंदी 22 जुलाई शा शुरू होग ते इस गैह कन्नै मकामी बसनीकें गी बड़ी राहत हासल होइ जाग।

<><><><><><>

## Asia cup

महिलाएं दे एशिया कप टी-20 क्रिकेट च कल संजा'लै श्रीलंका दे दाम्बुला च भारत नै पाकिस्तान गी 7एं विकेटें कन्ने हराई दित्ता। 109 रंजें दा पिच्छा करदे होई भारत नै एह लक्ष्य 7 विकेटें ते 35 गेदें दे होंदे पैहले गै पूरा करी लेआ। पैहले बल्लेबाजी दा फैसला करदे होई पाकिस्तान नै 19.2 ओवरें च 108 रंज बनाए हे। भारती शुरूआती बल्लेबाज शिफाली वर्मा ते स्मृति मंदाना होरें 40 ते 45 रंज बनाए। दीप्ती शर्मा होरें 20 रंज देइयै 3 विकेटां हासल कीतियां ते उनेंगी प्लेयर ऑफ द मैच चुनेआ गेआ। भारत ऐतवारें यूएई कन्नै अपना अगला मैच खेडोग।

<><><><><><>